

春

秋

通

論

識間有卓識之士摘取而議之者然終不出其範圍仍就其事以為論而時形已見方疑而忽信此違而彼從吾未見其可也夫是非之心人所咸有是則終是非則終非未有兩歧于是與非之間者嘗考其書其合理者人心自同可不必論若其解經之語大半紕繆與公穀等而其叙事惟富于文辭浮夸是尚亦多失實非果親見當時策書而受經于聖人者是以學者必宜舍傳以從經不可舍經而從傳韓昌黎云春秋五傳束高閣獨抱遺經究終始當時有鄒夾二傳今不傳誠哉是言也慨自三傳作俑以來其流之弊大端有二一曰例也一曰常事

不書也例之一字古所未有乃後起俗字執此一字以說春秋先已誤矣而謂孔子嘗執此一字以修春秋乎使孔子執一例以修春秋孔子既不若是之陋乃據其所為例者求之又多不合孔子又不若是之踈孔子裁定舊史以取其義不過數大端而其事已畢如造化之因物付物自然合理何嘗屑屑焉如經生家著一書執一例以從事哉嗚呼自例之一字興而唐王仲淹宋朱仲晦無不以孔子自命矣豈惟王與朱執一例以往人皆孔子戶戶有春秋矣又何難焉若夫常事不書之說實起于公羊而唐宋諸解經者靡不奉為龜鑑夫以

為常事不書則春秋所書者必非常之事也非常之事
必非禮也非法也非禮非法必皆譏皆貶也于是明明
得禮者必以為非禮明明合法者必以為非法深文羅
織固顧是非每條必砌成罪案使孔子為法家峻刻之
尤而春秋且為刑書為謗帖嗟乎誰毀誰譽之謂何而
誣聖人至是哉由是豎儒目不知書錯解孟子春秋天
子之事一語謂孔子假南面之權行賞罰之典黜陟諸
侯進退百職以匹夫而為天子雖以天王之尊亦不難
貶而削之是亂臣賊子孔子躬實自蹈而又何以懼天
下之亂臣賊子乎誣聖滅經罪大惡極不知春秋天子

之事云者以其主于尊周室明王法用一國以該天下
猶曰天子之事非諸侯之事也云爾錯解孟子一語以
致錯解孔子全經則又三傳之流弊至此為已極也予
用是發憤從事茲經大破三傳積習而後起之邪說悉
屏弗論獨摘孟子中所述則丘竊取之言反覆深思求
其取義所在此從來諸儒所略而弗道者雖以蠡測海
自知不量然竭其心智亦或得其一二非灼然人所共
信者不敢妄云次之則為書法書法人亦言之然究不
出例與常事不書二者為說安在其為書法也蓋書法
雖不同于取義亦必斷自聖衷出自聖筆學者均不可

略已以是二者分別孔子之新意與魯史之舊文加諸
標識無徒混焉莫辨一往求之過深震驚為神奇不可
知而春秋之旨或因是以彰焉未可知也彼昌黎之言
人疇不知第以空言是托求其束諸傳而究遺經者吾
目中未見其書也不揣狂悖大槩依斯言以成此編不
知有左何論公穀全經前後起應首尾貫穿即微左亦
自坦然明白不惟不用其解經之戾辭而亦何藉其叙
事之瑣語邪孤行一經實自予始質諸聖人諒可無罪
世即有訾我者亦弗恤也

康熙四十六年丁亥秋七月新安首源姚際恒識

春秋通論目錄

卷前

論旨

卷一

隱公

卷二

桓公

卷三

莊公

卷四

莊公

卷五

閔公

卷六

僖公

卷七

僖公

卷八

文公

卷九

宣公

卷十

成公

卷十一

襄公

卷十二

襄公

卷十三

昭公

卷十四

定公

卷十五

哀公

附春秋無例詳考一卷

春秋論旨

自古說春秋者莫害于例之一字予已著端于前序茲更詳之例字始見于杜元凱釋例以左氏之例而釋之也其言曰傳之義例總歸諸凡皆顯其異同從而釋之是例者實創始于左而發明于杜也嗟乎自有例之一字而春秋之義始不明于天下矣聖人據魯史以修春秋何嘗先自定其例乎其言曰其義則丘竊取不曰其例則丘竊取也聖人如化工然變化日新隨物付形無不各得如門人問仁問知問君子問為政同一問而其答之也各異初無一定之義則其不尚例槩可知矣使

聖人執一例以修春秋何殊印板死格尺寸不移此冬
烘之學規胥吏之計簿而烏足為聖人之書可傳于天
下萬世哉且史者尤不可執一例以為之也史以記事
事有萬變例豈能齊此合則彼違此同則彼異必致踈
漏多端是自取敗闕也乃杜氏執例以求見其或合或
否或同或異而例之說窮于是無以處此則又曰變例
後人因而為之辭曰美惡不嫌同辭夫例者一定不移
之謂也曰變則不合之別名也例既不合則無例可知
矣例者此為美辭彼為惡辭之謂也今美與惡同辭則
無例可知矣是皆自縛自解歸于遁窮究無說以處此

而世之人猶以例求春秋者何也自有例之一字而褒貶之說因以興焉春秋據事直書而善惡自見不惟孔子原無褒貶之心而春秋實亦無所容其褒貶也孔子不云乎吾之于人也誰毀誰譽自言其平日之存心也豈其修春秋而反是此所謂孔子原無褒貶之心也若夫直書其事如朝王如救伐此即是褒不能加一字以褒之也如弑君如滅國此即是貶不能加一字以貶之也若其他事本無可褒貶者則益不能加一字以褒貶之可知乃執例者勢不得不求其褒貶求之不得乃于書曰書月書名書字書氏書人書爵書國書師與其或

不書以上者之類而求之曰此褒也此貶也是使聖人
為巧佞之夫險側之輩資文字為喜怒借筆墨為譏彈
埋一字以中傷砌數言以成案意刻而文深心危而語
隱即稍貌為長厚者亦所深恥不為而謂孔子為之乎
嗟乎為其說者其亦思之否也此所謂春秋實亦無所
容其褒貶也又自有例之一字而常事不書之說因以
興焉公穀謂常事不書者何也彼見春秋君大夫少善
多惡故少褒多貶因為常事不書之說則凡所書者皆
貶也不知孔子又云如有所譽者其有所試矣聖人雖
言無毀譽然譽猶善于毀故又言譽有試不更言毀自

見毀之必不可有矣今若此則是聖人純有毀而無舉不更失聖人之心乎此因褒貶二字不能平施經中乃側重于貶故又為常事不書之說也凡此二邪說皆例之一字啓之君子所以歎息痛恨于三傳也

史者記事之書也春秋即史也既為史則書其事即是褒貶如史記為後代之書以文辭是尚者亦且直書其事不以已說參入其間已說乃別為論贊而況春秋之一字不多設者乎則褒貶之說春秋斷斷無矣史以記事則常事書非常之事亦書若獨取非常之事書而常事不書何以為史猶之獨取常事書而非常之事不書

不可以為史也則常事不書之說春秋斷斷無矣二說
既無則例亦無矣此皆由世人習而不察失記春秋為
魯史而別以春秋為孔子之神異經秘密藏故耳今為
道破其亦可以醒悟焉

近聖人之世莫過孟子而孟子願學孔子故其言春秋
亦最詳其曰春秋天子之事也謂孔子主乎尊周明文
武之道法故雖一國諸侯之事實天子之事也于是述
其言曰知我者其惟春秋乎罪我者其惟春秋乎知我
者謂其尊周也罪我者謂尊周則諸侯之僭竊自見惡
其害已也孟子又曰春秋成而亂臣賊子懼此惟指春

秋所書弑父與君者言之謂書之則將流惡名于千載
故懼也其義皆明白顯易別無甚深奧自宋人茫昧不
解孟子之言其于天子之事有人焉謂春秋只一箇權
字因而有人焉謂仲尼惇典庸禮命德討罪其大要皆
天子之事于是使孔子為僭竊之人其書為僭竊之書
而春秋亡矣其于亂臣賊子懼謂事事皆有貶皆所以
使之懼每一事必鍛鍊成一大罪求其所以誅亂賊之
心而後已雖明知誣罔有所不恤于是使孔子為法家
之人其書為法家之書而春秋亦亡矣

予嘗謂今日欲解春秋必先解

孟子良

不誣也惟孟子曰其事則齊桓晉文其文則史孔子曰

其義則丘竊取之矣此一語真孔子自言作春秋之要旨而諸儒偏置而弗道何也蓋以其不知其義之為何義也夫義之所在魯史臣寧不知之然必不能如聖人之至精至粹故孔子于其合者仍之其有未合者則以己意為之所謂竊取之是也後之人雖不能盡測然其大者亦自顯然可見約而求之豈無數端為世人之所可共信者若其餘則不敢穿鑿以失聖人正大之心不敢繁多以沒聖人謹嚴之意爰是加諸標識則春秋之眉目燦然略見而聖人之心事亦或躍如于紙上矣至于書法固聖人之餘事亦宜標出以別舊文使人知為

聖筆不可略也吾見春秋書目昔人有舍例從法之書舍例是已從法何不言從義乎誠以書法猶屬文辭不足以盡春秋耳愚主是二者以論春秋質諸後世君子其亦可不惑乎

春秋時去上古淳樸已遠其風不古而人心之不淑亦已甚矣故孟子曰春秋無義戰則凡春秋所書會盟征伐之事大抵皆屬不善故聖人据事直書而不善自見非貶之也設使孔子為唐虞史臣則其所書皆善言善政亦豈孔子褒之乎故謂之常事不書此最惑亂春秋誣罔聖人之邪說予謂史所記者大事耳如會盟征伐

必其有關於一國及天下之故而後書若小事則有不勝紀矣故為改之曰小事不書

自古以例說春秋予槩為婦盡惟標取義及書法二者又常事不書之說予改為小事不書如是則春秋之旨廢可復明聖人復起當不易斯言

予嘗見世儒說春秋亦有婦例者然所婦止胡傳後起最不通之例若公穀之例則未能全婦而左氏之例且不敢于輕議矣又所辨論者以此例之是駁彼例之非而亦自為其例究不出例之範圍也此由例之一字從來已久深入其肺腑故耳

古人間有以書法論春秋者而取義則從無人及之蓋春秋以取義為大不可混取義為書法猶之不可混書法為取義也須辨明始得

取義必其真確無疑灼然可共信者方敢標出若臆度影響之見似是而非者槩不敢妄標一字以冒不知而作之罪

春秋之有三傳久矣而左傳尤如影之附形學者頃刻不可離也然予謂經有三傳經之所以滋晦也公穀之紕繆世盡知之姑且無論而左氏之誣罔不實世或未盡知之也何則公穀言義其紕繆可以立見左氏言事

其誣罔難以懸知故世敢于闢公穀而不敢于闢左氏
為此故也近世季明德郝仲輿輩亦知闢左然旋闢而
旋据之終不能出左之範圍此非左之以事勝乎予觀
左解經之語亦大半純繆與公穀同而其事實與經牴
牾者什之三四然則經反非耶故其事難以懸知者亦
以經知而已夫傳以證經也傳不足以證經安用傳
為豈可舍經而從傳哉退之束傳之言蓋亦發憤有見
乎此然第言之而未見有行之者故予倣其意以著此
編經凡于一事必有首有尾如蛛絲馬迹未嘗不可以
見而其會盟征伐亦可合前後總觀而得之若夫傳之

繁文瑣事怪語夸辭以及幃房猥跡一切屏去廓然以清亦殊快人意何必沾沾焉盡据其事以說經乎且諸例實作俑于左則其害經也尤大又不可不知也

左氏固周人但非親見孔子亦非親見國史也故與經多抵牾然以其為周人其言亦時有可据者故予于他經凡後人說之不合者則以左傳正之而于春秋凡左傳說之不合者則以春秋正之

左傳雖出于張蒼然實顯于劉歆之手見歆移大常博士書或因謂歆偽作夫歆則安能作左傳豈不高了劉歆

編中公穀皆不置辨以不勝辨也惟左氏有與經牴牾
及誣罔不實者則辨之以世未能不信左也至于宋胡
安國亦妄自稱傳其純繆已極世人稍具心目者無不
周知又安用予辨為故公穀與胡氏槩不之及惟其中
凡言禮制者似乎鑿鑿實則皆杜撰無稽之言間一及
之無俾世惑而已

安國傳大槩祖述程正叔故朱仲晦稱之至今以行于
世又兼襲孫明復尊王發微劉原父意林諸書取其最
純繆者併非全自撰者又不可不知其所由云

劉原父春秋權衡專攻三傳盛名之書也然吾觀其攻

左惟在解經語人亦多知其謬又多辨杜註杜註之荒謬亦何足辨而彼皆沾沾以此為事其切要處則鮮及之若其攻公穀則益無論蓋亦淺陋之書也

李廉氏春秋會通專于詳例頗為害經然正予破例可資以查核

張洽氏集註明初與胡傳並用亦以張為朱仲晦之門人故其後專主胡而張廢予觀此書與胡亦相伯仲但謬妄不若之甚耳

崑山新刊經解春秋不下二三十種佳者絕少略可觀者呂大圭氏或問程積齋或問而已

黃東發解春秋語多有可觀間見于他處未見其全書也

高拱氏春秋正旨議論甚正

郝仲興春秋解甚平庸非左一帙亦淺陋無當其書專辨楚之非夷以己為楚人也致為可笑按楚本蠻方蠻與夷別古南方皆蠻國故孟子言南蠻夷則遠為外國也郝于蠻夷且未辨胡嘵嘵為吳越亦蠻也今江浙文采富麗且甲天下人何嘗以蠻少之而其人亦何嘗以蠻自歎邪

李明德春秋私考主于闕左可為有識然其自解則多

武斷是其所短至于考事必隱括顛末貫穿前後最爲
曉暢宋明以來之說春秋者未有能過之者也

凡經書魯君所行禮事多春秋時之禮春秋時之禮即
周禮也故周禮雖亡而賴春秋所書猶可得其千百之
什一柰何諸儒誤執常事不書之語槩以爲非禮書之
所以示譏然則諸傳及後人反知周禮而春秋之君臣
反不知乎此由誤執謬語以致曲說誣罔有所不恤耳
不知此乃大事所以書之亦可爲小事不書之證

謂春秋書災異不書祥瑞然則孔子爲幸災樂禍之人
矣有年大有年即童稚亦知祥瑞乃違心反說以爲記

異其可恨如此甚矣常事不書一語流毒以至于此極也

吾今始知後人解春秋率皆推求一二字以為說者亦無怪其然何則蓋由于不知魯史之舊文何在聖人之取義何在書法何在不得不藉是以為解經話柄若舍此直無置喙地矣

謂春秋委曲用心藏一二字為刺譏此世之陰險薄夫所為然則解春秋作如是觀者定是此一輩人耳

或問春秋既無褒貶然則孟子春秋成而亂臣賊子懼其義何居曰前已言之矣正由誤解孟子此語以孔子

爲天子以春秋爲刑書也然尚有未盡者按孟子此章
主言治亂之事故指其一事言之謂春秋書臣子弑君
父則亂賊自懼亂賊懼則天下治矣孔子之時本非治
也姑以此爲一治便于伸其治亂之說耳孟子與孔子
道同而跡不同孔子言言質實孟子生于戰國尚議論
丰采其言多有不可執泥者苟或執泥便會錯去如譴
諫而慙患好貨好色不將爲逢君之惡邪尚論聖賢所
宜知此豈儒笨伯事事必求所以使亂賊懼真不值一
笑也

世儒解春秋得孔子之意者上也言一事必合前後論

之周匝無遺使人一覽首尾瞭然者次也若僅就此一事評論善惡得失災祥報應膚辭套語漫衍盈幅此是史論與經旨毫無干涉斯為下矣吾見宋人解春秋大率不出下著而宋後至今諸家亦不能免焉愚著絕去此弊寧為簡略不敢一字稍涉史論覽者審之

編中取義者以○識之書法者以△識之註字于傍其無識者約略皆舊史文也非敢于聖言有所點污誠思冀得聖衷之一二爾知我者亮之

無例之說既備論于前又各詳于經文之下書成復加薈萃諸傳及後人所造種種謬例牛毛繭絲分條明辨

名曰春秋無例詳考以附于後吁竭其愚表大聲疾呼
至再至三冀得世人醒悟且俾覽此即可了然無俟旁
搜曲討也

春秋通論卷一

新安首源姚際恒

隱公惠公庶子在位十一年

春秋始于隱公者必當日祇就魯史原本從隱公而始也其前或別一史官或散佚難討均未可知無他義也或以平王爲言魯史無與周事且何不托始于東遷之時而托始于其末年乎

元年

諸侯奉天子正朔其有國也則各以其始年爲元蓋由來久矣

春王正月

王者君也主也春爲四時之首一歲所托始猶君主之義故曰春王爲此稱者所以重天時端歲首也春雖二三月亦必稱王而夏秋冬雖四七月亦不稱王後世于春曰青帝曰東皇雖近不經然未嘗非本此爲其名也此出孔子之取義而非魯史舊文何以見之有春下無王者乃仍舊文偶遺耳春秋本無例也後人不明此旨以王爲王者之王附會孔子尊王之義以春字句絕王正月三字連讀不知孔子固尊王然以史紀事之月而寓尊王之義亦殊無謂春秋

之時候國雖強王室雖弱即以桓文之強大猶秉正朔未聞敢有改易豈虞我魯之不奉正朔而特加王以明之乎且王稱天王亦孔子之取義也而亦有時仍舊文稱王所謂春秋無例也若春王則惟一王字並不稱春天王正月此亦可見春王之王非王者之王也自予道破此旨學者試平心思之春之下正月之上夾入一王者王字于中豈不近雅以王屬春下固不可若以王屬正月上正月固周王之正月也建春獨非周王之春乎時當曰王春正月乃可何以獨曰王正月乎又若王字主于尊王則一歲之正月足矣

何必兼二三月而言耶兼二三月而言是以春王爲義而非王正爲義明矣不然二三月可王四五月以往何不皆可王乎惟其錯解王字所以有後來夏時冠周月之謬說苟知春王二字本相連奚至有此謬說哉今常人不必通春秋之義者順口讀去必曰春王二字連正月而不曰春一字斷王正月者亦可見人心之有同然也且左氏亦曰春王周正月以春王二字連讀否則當以春字句絕又曰周王正月乃可今曰王周豈成文理耶是王之屬春不屬正尤斷斷然矣

若夫正月之爲建子也春之爲子月之冬也前人已多辨正力破邪說人多知之可無俟予贅矣

經凡四公不書即位此隱公與莊閔僖公也蓋皆即

位于先君之年故不書也

詳無例
詳考

左氏于此謂不書

即位攝也据謂隱公桓公均非適而隱居長則自應立豈可謂之攝乎隱在位十一年生稱公死稱薨與他公同初無攝之事跡可證固不待歐陽氏而後知其謬矣所以然者由左氏不得其不書即位之義于四公皆附會其說以質之謂莊不書即位爲文姜出故也閔不書即位爲亂故僖不書即位爲公出故皆

非其事而妄言詳無例于隱公益無以言之則創以爲拙尤屬鑿空無据合而觀之其悲爲附會昭然可見矣彼第從拙之一字辨之者猶知其然而未知其所以然耳

三月公及邾儀父盟于蔑

邾近魯小國非附庸也儀父其大夫也魯邾以隣國相盟邾子不親至而使大夫往其後亦是必有疾不能往也儀父名古多以父爲名如蔡侯考父齊侯祿父可證左氏謂即邾子克其謬有三克爲名則儀父爲字全經于諸侯未有稱字者一諸侯卒名及滅國

出奔或名從未有盟而稱名與字者二前稱邾儀父
後稱邾子克經從無此體三

夏五月邾伯克段于鄆

克者勝之之辭敵國則言伐言敗言取全經無言克者
今變文言克則以其爲兄弟之親不可以敵國言此
孔子之書法也

左氏曰稱邾伯譏失教也稱伯是其爵並無譏意又
曰段不弟故不言弟然則楚世子商臣弑父稱子豈
予其爲子乎又曰如二君故言克二君從未言克也
又曰不言出奔難之也經于來告則書不告則不書

豈有來告而難之不書乎且經于內諱未嘗于外諱
何難之之有可見摘取經字造爲謬例實左氏之作
俑也

秋七月天王使宰咺來歸惠公仲子之殯

天子常稱也春秋時皆稱天子爲王故孔子加天子王
上猶之稱天子也且以當時楚吳諸國有僭稱王者
故加天以別之此孔子尊王之義之大者所以曰其
義則丘竊取之矣天王字他經無見况史臣乎其出
孔子新意可知王稱天王春稱春王王之天猶春之王
正是一類語義亦可無疑于春王矣

宰非冢宰也宰本爲有職之通稱如邑宰亦稱宰是也經稱宰有二桓四年天王使宰渠伯糾來聘與此宰同僖三十年天王使宰周公來聘周公稱爵不名則爲冢宰可知也仲子惠公妻桓公母此必魯以惠公及仲子之喪同赴于周故天王亦同下贈天王贈諸候禮也惠公仲子二祔也不書及二祔同也或作惠公之仲子解謂以天子之尊下贈諸候之妾爲非禮不知此云惠公仲子與後書僖公成風同若云惠公之仲子僖公之成風無論君與妾子與母前後不應混同其文而春秋亦斷斷無此書法也

左氏謂緩耳子氏未薨故名按天王下賜諸侯距隱公
改元方七八月何云緩乎其云子氏未薨盡人知其
謬賜者因其來赴告也世無不赴告而預賜生者之理
蓋誤認二年夫人子氏薨爲仲子也因是穀梁又以仲
子爲惠公母孝公妾以證其蚤薨尤可怪其事于
何據乎乃主其說者謂據僖公成風之例不知穀
梁正誤解僖公成風耳說見至云贈人之母則可
贈人之妾則不可反若全賴此解爲天王出脫者
則更可笑矣

九月及宋人盟于宿

宿小國近采見莊十年采人遷宿茲公往宿與采人
盟而宿亦與可知及公及也或言公及或言及無例
謂此爲內稱及外稱人兩微者也非也人者通上下
之稱或亦微者未可知若內及則不必微者也莊二十
二年及齊高偃盟于防又謂不言公諱與大夫盟也
何居或亦以此爲公及謂不言公爲內諱然莊九年
公及齊大夫盟于既又何居

及猶與也書及或主我或主彼均不可知無例左氏
于前及邾儀父盟謂公欲求好于邾于此謂公立而
求成焉皆爲攝之一字爲此揣摩之說耳故允謂及

者我所欲與內爲主又皆祖此爲說俱不可從

冬十二月祭伯來

來來朝也王臣來朝不可以訓故止不言使下去朝

字

公子益師卒

公子而紀其卒未有不爲大夫者書公子常也間有書大夫公子者亦同無例不日史闕亦無例

二年

春公會戎于潛

會者兩相會之辭或內爲主或外爲主不可知無

例必謂會爲外爲主非也然考其地則亦有可知者
潛魯地是戎來而我會之也

春秋之時戎雜居中國久矣公會之要亦有不得已
者與然據義中國不當與戎爲盟會此亦直書其事
而義自見者無譏意

夏五月莒人入向

向小國近莒魯之地蓋嘗屬魯茲莒取之

人者通上下之稱故書人無例莒亦小國故常書人
無駭帥師入極

凡諸侯之子稱公子公子之子稱公孫公孫之子下

可稱公曾孫則爲之賜族族卽氏也孫嘗以王父字爲氏此無駭据左氏謂公子展之孫則當爲展氏矣左氏子八年無駭卒乃云羽父請諡與族請諡可也請族非也焉有終身爲大夫而無氏者哉決不待卒而後請族明矣說詳無駭卒下

極亦近魯莒附庸小國春秋初魯大夫無專兵之事凡稱某帥師者皆公使之也故或書公使或不書公使無例

秋八月庚辰公及戎盟于唐

盟日不日無例餘說見前會戎下

九月紀履緌來逆女 冬十月伯姬歸于紀

伯姬惠公之女先言女者從外稱也再言伯姬從內稱也

逆女或稱使或不稱使無例大夫或稱名或稱字亦無例以不稱使謂昏禮不稱主人撰爲有母無母之說謬甚以書大夫名謂非正譏不親迎尤鄙儒之見天子諸侯無親迎之禮所謂親迎者迎于境上非遠遼他國也

紀子伯莒子盟于密

紀莒皆近齊而紀尤甚故紀既昏魯而要莒為盟以

防齊也左氏謂魯故也則以其昏魯而要莒盟使莒
魯交好殊迂

子伯字必有誤或伯字衍左氏以伯作帛然不應大
夫先諸候

左氏以爲桓公之母即仲子則是元年天王先賜矣
謬不待辨公羊以爲隱公之母謂不書葬成公之意
子不終爲君母亦不終爲夫人亦謬經已明言夫人
矣惟穀梁以爲隱公夫人近是故人多從之公在故
不書葬

鄭人伐衛

左氏謂鄭共叔之亂公孫滑奔衛衛人爲之伐鄭取廩廪故此鄭討公孫滑之亂經于鄭伐衛書于衛伐鄭何以不書未敢信後倣此

言伐有言戰者有不言戰者言戰詳也不言戰畧也無例既伐矣安有不戰者哉謂不言戰衛已服此師生之見衛非弱小于鄭何事兵臨而即服耶四年衛人伐鄭衛之未服居然可見也

三年

春王二月己巳日有食之

日食必書志變也或言日與朔或言日或言朔或不

言曰與朔史之詳畧異而失之也

曰有食之本小雅可見古人亦用經

三月庚戌天王崩

平王崩孫桓王立

天王崩或忘崩不志葬或忘崩忘葬史之詳畧異也
無例杜氏謂不書葬魯不會非也凡書葬不必定是
魯會必如昭二十二年叔鞅如京師葬景王始是魯
會也不獨天王諸侯書葬皆然往會則書其但書
葬而不言葬者亦非魯會也說詳無例詳考

天子崩諸侯本有會葬之禮但夷陵至于春秋王室

弱諸侯強不知有王矣難以責諸侯會葬之禮也

夏四月辛卯尹氏卒

尹氏周之世卿尹吉甫之後當時皆稱其爲尹氏不敢名也如詩尹氏大師昭二十三年尹氏立王子朝是也周卿士不卒卒者亦如文三年王子虎卒定四年劉卷卒但彼名此不名異耳書劉卷卒者以其新在會也若此尹氏與王子虎以其權勢所在而私交之故書與

尹氏不書名不書爵蓋循當時之稱亦第曰尹氏耳則其以名字爵位爲褒貶者其非可知矣不然以其

有罪削其爵可也何為併削其名耶惟其所書如此故左氏不解而以為君氏聲子也與

秋武氏子來求賻

魯不奔喪會葬可也豈賻禮亦不致乎書來求賻以見王之過小魯之過大矣

不書王使未逾年不稱王也稱武氏子者大夫之子遺其名也

八月庚辰祭公和卒

天子曰崩諸侯曰薨今外諸侯皆稱卒者嫌與內君稱薨同也或曰從赴稱卒非也

外諸侯卒書曰書名常也或不日或不名闕也無例
冬十有二月齊侯鄭伯盟于石門

石門齊地鄭莊要盟于齊僖是時魯宋爲一黨齊鄭
爲一黨而齊鄭爲強宋鄭之爭始此而齊之伯亦由
是以肇焉

癸未葬宋穆公

外諸侯書葬說者謂魯人往會故書今按之殊不然
使凡書葬皆魯往會則如宣十年公子歸父如齊葬
齊惠公昭三年叔弓如滕葬滕成公之類何以獨書
而其他皆不書乎且如哀十年五月公至自伐齊葬

齊悼公方伐之歸而即遣人會葬必無此理也說詳
無例詳考

四年

春王二月莒人伐杞取牟婁

莒小國也前既入向茲又伐杞取其邑何其暴與
戊申衛州吁弑其君完

春秋公子弑君者商人歸生比皆書公子獨州吁無
知不書豈同一弑君父也又分別賢否與故書公子
與不書公子無例邪說者乃謂以國氏夫不書國知
爲何國事乎又謂罪君父不待以公子之道若然亂

臣賊子皆得以藉口不懼而反喜矣

夏公及宋公遇于清

清衛地前公與宋盟于宿茲宋欲伐鄭將接魯衛以共伐故與遇于衛地此宋所欲明甚然則謂及爲我所欲者非可知矣

宋公陳候蔡人衛人伐鄭

伐鄭之役据左氏謂宋殤公之立以公子馮出奔鄭鄭人欲納之故謀伐鄭今觀首書宋公則宋爲主兵以讐鄭可知也衛則爲其所接且非君往故與蔡同稱人或專以衛爲言衛固殺君于此條則無與也

秋翬帥師會宋公陳侯蔡人衛人伐鄭

夏四國伐鄭不得志至是要魯魯使大夫帥師復共伐之

春秋書法凡大夫出征皆不書公使其魯大夫出征春秋前之爲公使者在焉後之專兵者亦在焉左氏見不書公使遂謂宋公使來乞師公辭之羽父請以師會公不許固請而行故書曰翬帥師疾之也此昧于經之書法無公使之文而附會爲此說也魯宋交好盟于宿又過于清豈有來乞師而不與者乎春秋之初大夫無專兵之事固其同一書法而遂以後之

大夫專兵目其前其誤甚矣不可不辨

稱公子與不稱公子無例桓三年公子翬如齊逆女
又稱公子矣左氏于此曰書曰翬帥師疾之也于逆
女曰修先君之好故曰公子夫桓自娶夫人與先君
之好何與且先君之好惠公事也于何徵之乎是此
等例實起于左于公穀何責焉公穀襲左而益肆其
邪說耳

九月衛人殺州吁于濮

殺州吁稱人不得其實也左氏以爲石碯果爾經當
書其名矣

冬十有二月衛人立晉

立君未有書者爲人所立則書以見其國亂無主權移于下也此直書其事而義自見者若夫國不可一日無君而晉之惡此時又未著固無不宜立之意在也

左氏亦謂石碣立經亦書人不必從

或以不書公子爲貶則尹氏立王子朝書王子豈褒乎五年

春公觀魚于棠

非禮也

夏四月葬衛桓公

秋衛師入郕

郕衛之鄰國衛宣初立伐鄰見其暴也

九月考仲子之宮

考成也立宮以祀仲子宜也禮妾附于妾祖姑此謂有子者則例得入廟世祭矣鄙儒談禮一切皆謬總因常事不書之一語誤之也

仲子桓母必貴在隱母之上然隱桓均庶則隱長爲宜立而桓在隱世膺天王之賜得隆其母故隱亦爲之立宮獻羽桓駸駸以強卒致乎弑凡左氏以仲子

爲桓母是也以為即子氏非也

辨見前

季明德又以仲

子爲隱母按子爲君當如僖公母成風稱夫人矣此何以不稱夫人乎其非可知已蓋不稱夫人以桓非君也于此見春秋時何嘗不嚴嫡庶之名分而鄙儒猶多嘵嘵何哉

初獻六羽

天子八佾而魯以祀文王用之因以祀周公馴至于羣公之廟皆用之今以妾母之宮始酌而從諸侯之六孔子稱初有幸其合諸侯禮之意焉

邾人鄭人伐宋

邾小國序于宋上者是時無伯以主兵者言也然魯
宋方睦邾輒連鄭伐宋宜乎後之為魯伐與

填

記災也

冬十有二月辛巳公子廼卒

左氏謂葬之加一等豈以其書公子耶後之書公子
卒者多矣豈皆葬之加等乎甚矣其誣也

宋人伐鄭圍長葛

此圍而即還也故次年春鄭人得以來輸平至冬亦
人又伐乃取長葛耳公殺誤以此圍為直至次冬安

有圖及一年之久者乎

謬例謂將卑師少稱人今伐而圖其邑其非師少可知

六年

春鄭人來輸平

鄭方見逼于宋懼魯之復助宋也故來輸平後八年鄭始來歸祊而魯受之或謂此時預許歸祊非也

夏五月辛酉公會齊侯盟于艾

前此魯宋衛為一黨齊鄭為一黨自鄭輸平之後而魯始得與齊盟鄭為之也于是魯齊鄭為一黨而前

之同宋伐鄭者後且同鄭伐宋矣其反覆如此

秋七月

無事時首必書重天時也則春又為三時之首其書
春王益可信矣此亦孔子之取義間有不書者仍舊
史偶遺之也正以其有書有遺而知之

冬宋人取長葛

外取邑亦書此書者非以其久也公穀說誤見前
不言鄭蒙去年伐鄭圍長葛之文春秋一字不多誤
于此可見

七年

春王三月叔姬歸于紀

叔姬媵也媵也勝不書書之者所以為日後歸鄫張本
書歸鄫者所以著紀國之始終也若謂以為賢而志
之春秋宜列女傳耶且文姜之穢跡又何以詳載焉
甚矣俗儒之論大抵如此

媵侯卒

小國君卒有不書名者佚也左氏謂不書名未同盟
也非也即以八年蔡侯考父卒言之隱之世何嘗與
蔡同盟乎不書葬亦以國小略也

夏城中丘

凡城必書以設險動衆國之大事也非以其不時譏也

齊侯使其弟年來聘

既盟于艾矣又來聘齊魯交好也

或稱弟或稱公子無例泛則稱公子親則稱弟也齊侯使弟不失親親之義豈儒謂罪其有寵愛之私然則待弟之道固當因却之憎惡之乎仁人之于弟也親愛之而已矣其說云何

秋公伐邾

元年與盟今背盟以伐直書之義自見矣

左氏謂公伐邾為未討非也邾與鄭伐宋已及二年
今魯既結齊鄭與宋漸疎後且致伐何為而為宋討
乎蓋魯與邾鄰前雖與盟至是欺其弱小而伐之自
此邾屬于魯而叛服不常魯多伐之矣

冬天王使凡伯來聘

戎伐凡伯于楚丘以歸

楚丘魯地詳僖二年城楚丘下隱公雖與戎盟然豺
狼之性不可與文莊公時即伐魯矣是時戎方窺魯
見凡伯聘歸而伐之以歸若以楚丘為衛地此時未
聞戎在衛地也戎與狄異種衛為狄患不為戎患也

按經于此自當書伐若云戎執凡伯于楚丘以歸無
故而執之何與又自當書伐以歸若云戎伐凡伯于
楚丘執之以歸非春秋書法謹嚴之意也李夫張呈
言之殊無謂

八年

春宋公衛侯遇于垂

魯既與鄭平宋衛恐鄭之亦結于齊也故先為此過
然後要齊為瓦屋之盟所以絕鄭也左氏謂齊侯將
平宋衛意謂平宋衛于鄭也若然十年宋衛何為入
鄭乎

三月鄭伯使宛來歸祊

庚寅書法

我入祊

左氏謂鄭以祊易許田而經無其文迨桓公之時鄭伯以璧假許田是歸祊為一事假田為一事當舍傳而從經可也

鄭欲魯離宋衛之黨故啗之以利然歸祊之日未嘗不采頤許田特方欲結魯未敢遽言也迨桓篡位之後遂肆其欲以璧假為名卒取償于魯矣閱前後經文並非兩相交易之謂也

祊非我有曰來歸齊歸鄭謹龜陰田我田也亦曰來歸可見其無例矣然例無而書法則有之曰我入祊

明非我有也齊歸則無其文

春秋之初内外大夫皆書名無例名宛非駁也

夏六月己亥蔡侯考父卒

辛亥宿男卒

邪說謂宿未能同名故男卒按蔡未同盟而名之宿元年已同盟而不名其說恰相反

秋七月庚午宋公齊侯衛侯盟于瓦屋

自隱元年至莊十四年諸侯之會無有者主之惟主會者先焉自莊十五年以後諸侯之會皆伯者主之以伯者先焉此瓦屋之盟宋主之也在氏謂齊人卒

平宗衛于鄭則是齊王之何為先宗哉蓋誤以齊桓
以後解此也

且左氏謂齊人卒平宗衛于鄭而鄭且不與也又宗
衛讎鄭欲致齊以絕鄭豈齊之本意乎故明年齊鄭
卒伐宋矣此盟何益哉

八月葬蔡宣公

九月辛卯公及莒人盟于浮來

莒人即莒子以其國小常稱人諸傳昧此以為微者
又以微者例當言及不當言公及于是多方辭費以
解釋之是無故而自生荆棘也豈知人者上下之通

稱而及與公及無例即與微者盟亦可稱公及乎
填

冬十有二月無駭卒

春秋之初大夫皆書名內之無駭翬校柔溺外之鄭
宛屠紀裂繻皆名未以氏稱也自僖公以後內之天
夫未有不書氏者若臧孫叔孫季孫仲孫之類也非
甚則生而以字書者季友仲遂之類是也外之大夫
未有不書氏者齊高奚晉趙盾陽處父衛甯速孫良
夫宋華元華孫皆是也此蓋因時之變而非書法之
變也春秋之初惟內大夫卒而稱公子者二公子益

師公子樞是也此二公子者隱之叔父以尊故書之
其餘惟名而已故無駭揆皆不氏也然無駭揆之不
氏又異于翬柔溺之不卒矣無駭揆世祿也翬柔溺
非世祿也非世祿則亦不卒矣此亦呂大圭氏說無
以加此故為之刪改而錄焉

九年

春天王使南季來聘

九年之內王使三至而公不一答蓋直書之而義自
見然王璽之不張亦王有以自取之與

三月癸酉大雨震電 庚辰大雨雪

三月今正月雨雪之雨為下

挾卒

說見上

夏城郎

郎魯要地故城之

秋七月

冬公會齊侯于防

八年齊雅與宋衛盟瓦屋然非齊之本意也苟是將
謀伐宋而先會魯所以堅魯之心也明年會鄭伯盟
中丘而乃伐宋矣左氏謂宋公不王鄭伯為王左卿

士以王命伐之即據其述葛繻之戰鄭莊實不王矣而乃謂鄭以此加兵于宋乎且于取郕取防下云鄭莊公可謂正矣其顛倒是非如此

十年

春王二月公會齊侯鄭伯于中丘

此為伐宋之師期也

夏鞏帥師會齊人鄭人伐鄭宋

左氏謂羽父先會齊侯鄭伯伐宋自有此先字遂有鞏不氏先期也之邪說矣夫中丘三國咸集師期已定于此時何得謂鞏為先期乎

上書公會齊侯鄭伯此書輦帥師下書公敗宋師是
輦之帥師為公使甚明則四年之輦帥師其為公使
亦明矣不可以驗左氏之誣而予說之正乎

諸侯征伐必命將帥師不親臨陣也故書輦帥師而
下稱齊人鄭人人者猶之子輦也下書公敗宋師于
營即輦敗宋師將之功歸于君也且勝負宜以國見
也若稱輦敗宋師豈成書法耶世儒貿貿見書輦則
以為輦書公則以為公茫然若魯有兩師者經之書
法全然不曉而尚欲解經乎呂大圭以有公為奇陵
潛師出其不意而敗之之說

六月公敗宋師于菅

說見上

辛未取郛 辛巳取防

左氏謂鄭莊公于是可謂正矣以王命討不庭不貪其^土蒞^上勞王爵正之體也不獨是非失實且與鄭何與經書我取郛取防傳言鄭取而歸于我豈可信取劉原父謂如傳言春秋為縱漏鄭伯取邑之罪反移之其君也誠然

不言宋亦蒙上文

秋宋人衛人入鄭 宋人蔡人衛人伐戴鄭伯伐取之

宋報夏之伐也鄭幸管之收師還在郊宋衛乃乘其
虛而入之戴鄭之與國宋衛又要蔡共伐之而鄭乃
因其伐戴掄其不備伐取三國之師焉或以取為取
戴夫戴若為三國得鄭取還之可也然三國未嘗得
戴也若為鄭取戴夫伐戴者三國也鄭不伐戴何為
取之耶耶鄭自伐戴可也何必因三國之伐始伐取
之耶至有謂鄭既取戴又兼取三國之師以一取四
尤必無之理

冬十月壬午齊鄭人入邾

邾近于衛衛之與國齊鄭入其國猶宋衛伐戴之意

左氏亦謂討逆王命悉誣

十有一年

春滕侯薛侯來朝

滕薛鄰國故相要同來朝魯而經亦並言之劉原父
謂二君不特言者譏其旅見然則豈有二君同來而
今日見一君明日又見一君乎此總為常事不書之
說所誤以致此深文耳其說有闕典禮不可不辨

夏公會鄭伯于時來

鄭將伐許也

秋七月壬午公及齊侯鄭伯入許

許與鄭鄰故鄭棲齊魯以入之利己之私也入人之國而左氏猶謂之知禮其誣可勝道哉

冬十有一月壬辰公薨

取義

魯十二公惟隱閔二公薨不書地不書葬以見其偽弑也不書弑者為尊親諱也而以不書地不書葬見之者不沒其實也桓亦遇弑而書地書葬者書地以其于外也若不書葬嫌于內之弑之也此等處史臣所不能惟孔子明乎為人臣之義而然也故為孔子之取義也

或謂不書地為不忍言不書葬為賊未討皆井姪之

見不足深辨其賊未計不書
詳無別詳考